

րին, երեւի, շատ հաճելի չեղաւ տարածամ հիւրերի այցելութիւնը. նա միթմր-թալով դուրս եկաւ իր դարանից, – «ո՞ր սատանան ես վախտը դուրս կը գայ իր բունից» – խօսեց քնթի տակից եւ սկսեց ձիաները ներս քաշել դէպի փարախը: Դա իմ նախածանօթ Մըհէն էր, որ առաջ աջակցում էր Աւօյին նրա որսորդութիւնների մէջ, իսկ այժմ մի աստիճան եւս բարձրացել էր իր պաշտօնի մէջ, դառնալով անասունների վերակացու: Տղերքը այն աստիճան սովորած էին նրան, որ ամենեւին ուշադրութիւն չդարձրին նրա դժգոհութեանը եւ պատողիբեցին շատ գարի եւ դարման տայ ձիաներին:

– Մըհէն գիտէ, ասել պետք չէ, քսան տարի է, Մըհէն ձիաների հետ գործ ունի, – պատասխանեց նա խռպոտ ձայնով եւ դիմեց դէպի մարագը:

Որսորդի տնակը, բացի ախոռատնից, բաղկանում էր մի քանի փոքրիկ սենեակներից, որոնցից մէկը պատրաստած էր հիւրերի համար. երբ ճրագ վառեցին, ամենքը հաւաքեցեան այնտեղ: Շուտով յայտնուեցաւ եւ տաւուտերը, որ բակում Կարօյի հետ մեզ անլսելի ձայնով խօսում էր:

– Դէ՛, շուտ, Աւօ, տղերքը ուտել են ուզում, – դարձաւ դէպի նա Կարօն:

– Գայլի նման, – վրայ բերեց Սագօն, – ինչ «հոգու բաժին» ունես, ամենը, ամենը բե՛ր:

– «Տարածամ հիւրը իր բախտից պետք է գանգատո՞ի», – պատասխանեց որսորդը թուրքերէն առածով: – Աստուծոյ տոածից ինչ ունեմ, կը բերեմ:

– Ու՞ր են, ոչ մէկը չէ երեւում, – հարցրեց Ասլանը:

– Յասուն դաշտումն է, նա իր անասուններն է պահում. անիծած քրդերը իստակ կատաղել են, հէնց որ աչքդ հեռացնում ես, էլ ապրանքիդ տերը չես: Մարօն քնած է, ես նրան կը զարթեցնեմ:

Նա դուրս գնաց ընթրիք պատրաստել տալու:

Ես մնացի աննկատելի: Ընկերներիցս ոչ ոք չխօսեց որսորդի հետ իմ մասին. իսկ ես ամաչում էի, որ մօտենամ, նրա ձեռքը համբուրեմ ու ասեմ ես քո Ֆարհատն եմ, դու միշտ սիրելի ես ինձ:

Բայց ինչո՞ւ ես այնքան ուրախացայ, երբ նա խոստացաւ զարթեցնել Մարոյին, ինչո՞ւ իմ աչքերն այնպէս անհամբերութեամբ նայում էին դէպի դուռը, որտեղից նա պետք է ներս մտներ: Ա՛խ, որքա՛ն սիրելի է լինում մանկութեան ընկերը, մանկութեան անմեղ բարեկամը:

Տղերքը մի կողմ դրեցին իրանց զէնքերը, նստեցին բուրդից գործած թանձր օթոցների վրայ, որոնցով ծածկուած էր սենեակի յատակը: Շատ չան-